



La Quotidiana 4-2-2014, p. 12

## **HEV/AGC beneventa la nova lescha davart la protecziun civila**

■ (cp) En il Grischun èn actualmain tant la protecziun da la populaziun sco era la protecziun civila reglads en la lescha davart l'agid en cas da catastrofas. Da nov duai dar, tuttina sco sin plaun federal, duas leschas. L'Associaziun grischuna dals proprietaris da chasas (HEV/AGC) renconuscha che la confederaziun vul transfurmar a moda correcta il dretg federal, renda dentant attent che quai possa agravar la reglamentaziun dad oz.

Sco garanzia per il bajetg e l'equipament da las plazzas lubidas dal refugi po il chantun uschia per exempel incassar en l'avegnir dals patruns da construcziun ina prestaziun finanziaria da la dubla autezza dals custs provisorics dal refugi. Dal punct da vista da l'AGC Grischun n'è quai betg ina reglamentaziun usitada en la branscha da construcziun ed exagerada da sia autezza finanziaria. I na po betg esser ch'i vegnan relaschadas talas reglamentaziuns restrictivas pervi da paucs patruns da bajegiar che n'han betg realisà u betg cumplettà projects da refugis. Questa reglamentaziun scuflenta la lescha ed è latiers in votum da disfidanza envers il patrun da construcziun.

En vischnancas cun damain che 1000 abitants duajan plinavant vegnir construids refugis era tar chasas cun damain che 38 stanzas. Tenor l'AGC fa quai pauc senn e n'è surtut betg economic.